

職○夜東方南方西方有氣如火○壬辰臺諫啓李夢麟等事皆不允
○大司諫柳世麟等上劄曰人君撻攬紀綱端拱於上有司恪勤官守
奔走于下上不親小事下不徇己意然後體統尊嚴上下齊整庶民陳
訴百寮情職特在該司辨釋而糾舉之臣等伏見 殿下如傷之仁切
於釋冤恭己之嚴先於振綱而小民訴狀親自判付庶寮糾罪亦自程
限如傷之心失於區區恭己之德近於瑣瑣刑部之掩置判付法司之
多端啓稟固不得辭其罪矣以人君之尊而行有司之任亦豈撻攬端
拱之道乎元首叢挫股肱惰哉虞朝之所以相戒而庶獄庶慎罔敢知
茲文王之所以能臻至治也伏願 殿下務存大體無虧盛德傳曰務
大體之言至好○癸巳臺諫啓李夢麟等事不允○甲午御朝講○
三公啓曰日候甚熱明日文臣殿講冒熱而出至為未安姑待清涼為
之若諸事已備勢不得已則 命官為之何如傳曰命官為之○臺諫
啓李夢麟等事皆不允○日暈○乙未 命右議政尹殷輔等講專經
文臣于慶會樓下○臺諫啓李夢麟等事憲府又啓臨淮守樹敗常錄
案後尚不悅心京妓滿園紅率歸星州以監司南孝義為隣友而到處
干謁誇示衆人招聚道內訟者以勝負利害囑之公然受賂且以守令